

Berita Harian - BSN Perkenal Cabutan Baharu, Tambah Ganjaran RM20j

 Selasa, Jan 02 2018

BSN perkenal cabutan baharu, tambah ganjaran RM20j


**Fakta
nombor**

2.9 JUTA

penyimpan SSP BSN
setakat November 2017

RM3.28 BILION
jumlah simpanan

[FOTO SADDAM YUSOFF/BH]



Menteri Kewangan II, Datuk Johari Abdul Ghani (empat dari kanan) bersama Yunus (dua dari kiri) bergambar bersama pemenang bulan November 2017 pada majlis cabutan SSP BSN di Kuala Lumpur.

Bank Simpanan Nasional (BSN) meneruskan Kempen Cabutan Khas RM1 juta setiap bulan sepanjang tahun ini serta memperkenalkan cabutan baharu sebagai penghargaan khas untuk penyimpan Sijil Simpanan Premium BSN (SSP BSN).

BSN menerusi satu kenyataan berkata, jumlah keseluruhan ganjaran juga akan ditambah menjadi RM20 juta pada tahun ini, termasuk pengenalan Cabutan Remaja Istimewa dengan jumlah keseluruhan hadiah bernilai RM250,000.

Katanya, cabutan itu terbuka kepada remaja berusia 12 tahun hingga 21 tahun yang akan diadakan pada Mac tahun ini.

"Pengenalan cabutan baharu ini adalah sebagai tanda penghargaan kepada pelanggan yang setia menyimpan di SSP BSN yang kini mencecah tahun ke-40 bermula dari 1978 hingga 2018.

Jutawan ke-12 diumumkan

"Ini adalah peluang kepada orang ramai yang masih tidak mempunyai simpanan SSP BSN untuk berbuat demikian supaya berpeluang memenangi lebih banyak ganjaran lumayan yang ditawarkan oleh BSN," katanya.

BH 2/1

Sementara itu, Ketua Eksekutif BSN, Datuk Yunus Abd Ghani, berkata menerusi kesinambungan kempen cabutan SSP BSN 2017 '12 juta ringgit, 12 jutawan, 12 bulan', BSN baru-baru ini mengumumkan jutawan ke-12 bagi cabutan SSP BSN diadakan di Wisma BSN, Kuala Lumpur.

"Dengan pengumuman jutawan ke-12, ini bermakna kempen SSP BSN sudah sampai ke penghujung dengan jumlah keseluruhan ganjaran bernilai lebih RM17 juta diberikan kepada pemenang sepanjang 2017.

"Sehingga November 2017, SSP BSN terus mendapat sambutan daripada orang ramai dengan lebih 2.9 juta orang penyimpan di seluruh negara dan nilai simpanan melebihi RM3.28 bilion," katanya.

Pada majlis sama, BSN turut meraikan pemenang bulan November 2017 yang dijemput hadir menerima hadiah yang dimenangi. Hoo Mei Yoong dari Perak memenangi RM1 juta bagi Cabutan Istimewa, S Vuvurajan juga dari Perak memenangi kereta BMW 318i bagi Cabutan Bulanan dan M Maithili dari Pulau Pinang memenangi SSP BSN RM10,000 bagi Cabutan Remaja Kategori Khas.